

# Organisaziuns dastgan recurrer cunter novas zonas da bajegiar

## Il tribunal federal decida en ina cussegliaziun publica

DA CLAUDIA CADRUVI / ANR

■ **Las organisaziuns d'ambient dastgan recurrer sche zonas da bajegiar vegnan stgaffidas da nov u engrondidas. Quai ha il tribunal federal decidì ier a chaschun d'in cas da Lucerna. Là aveva la dretgira chantunala snegà che las organisaziuns d'ambient hajan insumma la legitimaziun da purtar plant.** La Fundaziun svizra per la protecziun da la cuntrada aveva fatg recurs en cunter la decisiun da la dregira lucernaisa. La chaussa pertutga la vischnanca Adligenswil: Il 2014 aveva la radunanza communal approvà ina revisiun totala da la planisaziun cun novas zonas da bajegiar. La regenza lucernaisa ha lubì ils plans cun tschertas modificaziuns. Ma il recurs da la fundaziun per la cuntrada ha la regenza refusà.

La fundaziun è sinaquai sa drizzada a la dretgira chantunala. Lezza ha snegà la

legitimaziun da recurrer da la fundaziun – dano tar ina suletta parcella cun in biotop, nua che la protecziun d'in biotop era contestada.

Ier ha il tribunal federal fatg ina cussegliaziun publica davart quest cas ed ha approvà il recurs da la fundaziun. La dretgira lucernaisa sto uss anc ina giada s'empatschar da la chaussa e trair en consideraziun las resalvas da la fundaziun.

Il tribunal federal afferma che las organisaziuns d'ambient hajan uss – dapi la revisiun da la lescha per la planisaziun dal territori – il dretg da recurrer sche zonas da bajegiar vegnan engrondidas u stgaffidas da nov. Enfin uss eran las organisaziuns da protecziun mo legitimadas da recurrer en cas spezials.

Cun la revisiun da la planisaziun dal territori haja il parlament federal vuli retgnair il sfarlattim da terren e la construcziun spatitschada e nuncoordinada en Svizra.